

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 422283 22 St
Tuzla, 09.10.2023. godine

Općinski sud u Tuzli, stečajni sudija Vedran Milašinović, u stečajnom postupku nad imovinom stečajnog dužnika „PRIMATEH“ d.o.o. Gradačac, za proizvodnju i trgovinu, ul. Sarajevska bb, dana 09.10.2023. godine, donio je sljedeće:

RJEŠENJE

Daje se saglasnost na prijedlog završne diobe podnesen od strane stečajnog upravnika dana 19.06.2023. godine.

Obrazloženje

Stečajni upravitelj je dostavio prijedlog završne diobe dana 19.06.2023. godine, u kojem se navodi da unovčena stečajna masa iznosi 57.783,00 KM, da preostala sredstva za završnu diobu nakon isplate svih troškova postupka i rezervisanja sredstava za završne aktivnosti iznose 38.600,00 KM, a s obzirom da priznata potraživanja povjerilaca višeg isplatnog reda ukupno iznose 79.743,97 KM, to bi se navedeni iznos od 38.600,00 KM trebao isplatiti povjeriocima višeg isplatnog reda radi njihovog djelimičnog namirenja u procentu od 48,405%, tako da bi Poreznoj upravi (priznato potraživanje višeg isplatnog reda od 78.866,97 KM) bilo potrebno isplatiti 38.175,50 KM, a Nedžadu Musiću (priznato potraživanje višeg isplatnog reda od 877,00 KM) iznos od 424,50 KM.

S obzirom na nedostatak stečajne mase za dalje namirenje potraživanja povjerilaca višeg isplatnog reda, kao i povjerilaca opšteg isplatnog reda u cjelosti, prijavljena je nedovoljnost stečajne mase u pogledu ostatka potraživanja.

Rješenjem od 18.05.2023. godine je zakazana skupština povjerilaca za dan 06.07.2023. godine, a kojim je predviđeno da će se nakon posebnog ispitnog ročišta iznijeti izvještaj o dosadašnjem tokom postupka, prijedlog završne diobe i odluke o zaključenju stečajnog postupka, a koje rješenje je objavljeno na oglasnoj ploči suda, web stranici suda te u SI novinama FBiH broj 38/23 dana 24.05.2023. godine.

Rješenjem od dana 20.06.2023. godine su objavljeni tabela naknadno prijavljenih potraživanja i izvještaj stečajnog upravnika o provedenom stečaju, prijedlog završne diobe i prijava nedovoljnosti stečajne mase na oglasnoj tabli suda, elektronskoj tabli suda, te su stavljeni na uvid svim učesnicima na pisarnici suda.

Na skupštini povjerilaca održanoj dana 06.07.2023. godine je donesena odluka kojom se usvaja prijedlog stečajnog upravnika da se izvrši isplata troškova stečajnog postupka, izvrši dioba povjeriocima prema prijedlogu i o tome obavijesti povjerioce, sačini završni račun i dostavi sudu, te zaključi stečajni postupak.

S obzirom da na prijedlog diobe nije bilo prigovora, da je skupština povjerilaca usvoila navedeni prijedlog bez izmjena i/ili dopuna, te da je i po ocjeni suda isti u skladu sa zakonom, temeljem odredbe člana 188 stav 6 Zakona o stečaju ("Sl. novine F BiH" br. 53/21) odlučeno je kao u izreci ovog rješenja.

Stečajni upravitelj je dužan izvršiti diobu povjeriocima shodno prijedlogu, dostaviti dokaz o izvršenoj diobi i podnijeti završni račun (član 188 stavovi 7 i 15 Zakona o stečaju), nakon čega predstoji donošenje odluke o zaključenju stečajnog postupka shodno odredbi člana 190 stav 1 Zakona o stečaju.

Stečajni sudija
Vedran Milašinović

Pouka o pravu na izjavljivanje pravnog lijeka:

Protiv ovog rješenja je dozvoljeno izjaviti žalbu Kantonalnom sudu u Tuzli, a koja se podnosi putem Općinskog suda u Tuzli, najkasnije u roku od osam dana nakon isteka petog radnog dana od dana objavljivanja rješenja na oglasnoj ploči i elektronskoj ploči (web stranici) suda.